

Veteranonan di Guera encanta cu estatua y monumento

Minister Ramon Lee ta duna baluartenan digno reconocimiento

STA. CRUZ--Despues cu recientemente di Stichting Herdenking Schutterij (SHS) a publica un buki danki na cooperacion cu Minister Ramon Lee, awor e monumento y estatua tambe a keda desvela. Esaki tabata otro paso mas pa e veteranonan di e di dos guera mundial, kendenan a defende nos costanan contra enemigo, pa haya reconocimiento mereci. Siman pasa e estatua a keda desvela na Adriaan Lacle

Boulevard riba loke tambe a keda inaugura e dia ey como Plaza Defensornan di Aruba. E sobrevivientenan di e mas di 1480 schutter y mas di 500 VKA cu tabata presente, a keda sumamente contento y orguyoso di e logro aki. E emocion tabata evidente riba caranan di tur, como tambe den e discursonan hiba. Tabata sr. Enrico Emerencia, presidente di e fundacion kende a hiba palabra gradiciendo un y tur pa nan contribucion. E logro aki

tabata danki na cooperacion di hopi instancia, tanto di sector publico como sector priva.

Akinan mester enfatiza cu desde nan existencia, nunca antes nan a haya asina tanto atencion y cu realizacion di tanto proyecto. Hasta ta asina cu den pasado nan a sinti nan mes mal usa y defrauda door di un "monumento" cu a usa nan causa pero tabata yen di fayonan barbaro historicamente, den e ruina

banda di aeropuerto. Awor e Plaza, monumento y estatua aki, si ta rindi honor debidamente na nan servicio brinda. E monumento awor ta consisti di un estatua riba un pedestal di piedra di Aruba cu ta simboliza nan sacrificio como sentinela den servicio di nan pais den tempo di guera firmemente para riba nan baranca. Minister Lee di su parti, di awor caba ta felicita tur ex-schutter y miembro di VKA pa e estatua y monumento

aki. Pabien. Pa Minister Ramon Lee ta un orguyo di por cumpli cu loke e ta mira como su deber di gradici tur e schutter y miembronan di VKA pa nan bon trabao di balor pa defensa di nos patria y percura pa e historia aki keda graba pa futuro generacionnan. Como parti di e plan Integral di Cultura, e aspecto di reconoce nos mes hendenan y nos baloman, lo keda resalta pa asina engrandece nos cultura y nos pais.